


雜阿含經

第十二

二百七十二
盛二

49473



雜阿含經卷第十二

宋天竺三藏求那跋陀羅譯

法苑珠林

盛

如是我聞一時佛住舍衛國祇樹給孤獨園
尔時世尊告諸比丘若於結所繫法隨生味
著願念心縛則愛生愛緣取取緣有有緣生
生緣老病死憂悲惱苦如是如是純大苦聚
集如人種樹初小漸弱愛護令安墜以糞土
隨時澆灌冷暖調適以是因緣然後彼樹得
增長大如是比丘結所繫法味著將養則生
恩愛愛緣取取緣有有緣生生緣老病死憂
悲惱苦如是如是純大苦聚集若於結所繫
法隨順無常觀住生滅觀無欲觀捨觀

不生願念心不縛著則愛滅愛滅則取滅取滅
則有滅有滅則生滅生滅則老病死憂悲惱
苦滅如是如是純大苦聚滅猶如種樹初小
漸弱不愛護不令安隱不壅糞土不隨時澆
灌冷暖不適不得增長若復斷根截枝段段
斬截分分解析風飄日炙以火焚燒燒以成
糞或颺以疾風或投之流水比丘於意云何
非為彼樹斷截其根乃至焚燒令其磨滅於
未來世成不生法耶答言如是世尊如是比
丘於結所繫法隨順無常觀住生滅觀無欲
觀滅觀捨觀不生願念心不縛著則愛滅愛
滅則取滅取滅則有滅有滅則生滅生滅則

老病死憂悲惱苦滅如是如是純大苦聚滅
佛說此經已諸比丘聞佛所說歡喜奉行
如是我聞一時佛住舍衛國祇樹給孤獨園
尔時世尊告諸比丘若於所取法隨生味著
願念心縛其心驅馳追逐名色名色緣六入
處六入處緣觸觸緣受受緣愛愛緣取取緣
有有緣生生緣老病死憂悲惱苦如是如是
純大苦聚集譬大樹根幹枝條柯葉華果下
根深固壅以糞土漑灌以水彼樹堅固永世
不朽如是比丘於所取法隨生味著願念心
縛其心驅馳追逐名色名色緣六入處六入
處緣觸觸緣受受緣愛愛緣取取緣有有緣

生生緣老病死憂悲苦惱如是如是純大苦
聚集若於所取法隨順無常觀住生滅觀無
欲觀滅觀猒觀心不顧念無所縛著識則不
驅馳追逐名色則名色滅名色滅則六入處
滅六入處滅則觸滅觸滅則受滅受滅則愛
滅愛滅則取滅取滅則有滅有滅則生滅生
滅則老病死憂悲苦惱如是如是則純大
苦聚滅猶如種樹不隨時愛護令其安隱不
壅糞土不隨時澆灌冷暖不適不得增長若
復斷根截枝段段斬截分分解析風飄日炙
以火焚燒燒以成糞或颺以疾風或投之流
水比丘於意云何非爲彼樹斷截其根乃至

焚燒令其磨滅於未來世成不生法耶。答言
如是世尊如是比丘於所取法隨順無常觀
住生滅觀無欲觀滅觀捨觀不生願念心不
縛著識不驅馳追逐名色則名色滅名色滅
則六入處滅六入處滅則觸滅觸滅則受滅
受滅則愛滅愛滅則取滅取滅則有滅有滅
則生滅生滅則老病死憂悲惱苦滅如是如
是純大苦聚滅佛說此經已諸比丘聞佛所
說歡喜奉行

如是我聞一時佛住舍衛國祇樹給孤獨園
尔時世尊告諸比丘我憶宿命未成正覺時
獨一靜處專精禪思生如是念世間難入所

謂若生若老若病若死若遷若受生然諸衆
生生老病死上及所依不如實知我作是念
何法有故生有何法緣故生有即正思惟起
無間等知有有故生有有緣故生有復思惟
何法有故有有何法緣故有有即正思惟如
實無間等起知取有有故有有取緣故有有又
作是念取復何緣何法有故取有何法緣故
取有即正思惟如實無間等起知取法味著
願念心縛愛欲增長彼愛有故取有愛故緣
取取緣有有緣生生緣老病死憂悲惱苦如
是如是純大苦聚集諸比丘於意云何譬如
緣膏油及炷燈明得燒數增油炷彼燈明得

久住不答言如是世尊如是諸比丘於色取
味著願念愛縛增長愛緣故取取緣有有緣
生生緣老病死憂悲惱苦如是如是純大苦
聚集我時復作是念何法無故無此老病死
何法滅故老病死滅即正思惟起如實無間
等無生則無老病死生滅故則老病死滅復
作是念何法無故無生何法滅故生滅即正
思惟起如實無間等有無故生無有滅故生
滅又復思惟何法無故有無何法滅故有滅
即正思惟生如實無間等觀取無故有無取
滅故有滅又作是念何法無故取無何法滅
故取滅即正思惟生如實無間等觀所取法

無常生滅離欲滅盡捨離心不願念心不縛
著愛則滅彼愛滅故取滅取滅故有滅有滅
故生滅生滅故老病死憂悲惱苦滅如是如
是純大苦聚滅諸比丘於意云何譬如油炷
然燈若不增油治炷非彼燈明未來不生法
盡磨滅耶比丘白佛言如是世尊如是諸比

丘於所取法觀察無常生滅離欲滅盡捨離
心不願念心不縛著愛則滅愛滅則取滅乃
至純大苦聚滅佛說此經已諸比丘聞佛所
說歡喜奉行

如是我聞一時佛住舍衛國祇樹給孤獨園
尔時世尊告諸比丘我憶宿命未成正覺時

獨一靜處專精禪思如上廣說差別者譬如
載樵十束二十束三十束四十束五十束百
束千束百千束積聚燒然作大火聚若復有
人增其乾草樵薪諸比丘於意云何此火相
續長夜熾然不比丘白佛言如是世尊如是
諸比丘於所取法味著願念心縛著增其愛
緣取取緣有乃至純大苦聚集諸比丘若彼
火聚熾然不增樵草諸比丘於意云何彼火
當滅不答言如是世尊如是諸比丘於所取
法觀察無常生滅離欲滅盡捨離心不願念
縛著愛則滅愛滅則取滅如是廣說乃至純
大苦聚滅佛說此經已諸比丘聞佛所說歡

喜奉行

如是我聞一時佛住舍衛國祇樹給孤獨園
尔時世尊告諸比丘我憶宿命未成正覺時
獨一靜處專精禪思作是念何法有故老死
有何法緣故老死有即正思惟生如實無間
等生有故老死有生緣故老死有如有取
愛受觸六入處名色何法有故名色有何法
緣故名色有即正思惟如實無間等生識有
故名色有識緣故有名色有我作是思惟時
齊識而還不能過彼謂緣識名色緣名色六
入處緣六入處觸緣觸受緣受愛緣愛取緣
取有緣有生緣生老病死憂悲惱苦如是如

是純太苦聚集我時作是念何法無故則老
死無何法滅故老死滅即正思惟生如實無
間等生無故老死無生滅故老死滅如是生
有取愛受觸六入處名色識行廣說我復作
是思惟何法無故行無何法滅故行滅即正
思惟如實無間等無明無故行無無明滅故
行滅行滅故識滅識滅故名色滅名色滅故
六入處滅六入處滅故觸滅觸滅故受滅受
滅故愛滅愛滅故取滅取滅故有滅有滅故
生滅生滅故老病死憂悲惱苦滅如是如是
純大苦聚滅我時作是念我得古仙人道古
仙人逕古仙人道跡古仙人從此跡去我今

隨去譬如有人遊於曠野披荒覓路忽遇故
道古人行處彼則隨行漸漸前進見故城邑
故王宮殿園觀浴池林木清淨彼作是念我
今當往白王令知即往白王大王當知我遊
曠野披荒求路忽見故道古人行處我即隨
行我隨行已見故城邑故王宮殿園觀浴池
林流清淨大王可往居止其中王即往彼止
住其中豐樂安隱人民熾盛今我如是得古
仙人道古仙人逕古仙人跡古仙人去處我
得隨去謂八聖道正見正志正語正業正命
正方便正念正定我從彼道見老病死老病
死集老病死滅老病死滅道跡見生有取愛

受觸六入處名色識行行集行滅行滅道跡
我於此法自知自覺成等正覺爲比丘比
丘及優婆塞優婆夷及餘外道沙門婆羅門
在家出家彼諸四衆聞法正向信樂知法善
梵行增廣多所饒益開示顯發佛說此經已
諸比丘聞佛所說歡喜奉行

如是我聞一時佛住王舍城迦蘭陀竹園
時尊者舍利弗尊者摩訶絺羅在耆闍崛
山尔時尊者舍利弗晡時從禪覺詣尊者摩
訶拘絺羅共相問訊慶慰慰已於一面坐語
尊者摩訶拘絺羅欲有所問寧有閑暇見答
與不尊者摩訶拘絺羅語尊者舍利弗言仁

者且問知者當答尊者舍利弗問尊者摩訶
拘絺羅云何尊者摩訶拘絺羅有老不答言
有尊者舍利弗復問有死不答言有復問云
何老死自作耶爲他作耶爲自作他作耶爲非
自非他無因作耶答言尊者舍利弗老死非
自作非他作非自作亦非非自作他作無因
作然後彼生緣故有老死如是生有取愛受觸
六入處名色爲自作爲他作爲自作爲非
自作無因作答言尊者舍利弗名色非自作
非他作非自作非非自作無因作然彼
名色緣識生復問彼識爲自作爲他作爲自
他作爲非自作爲他無因作答言尊者舍利弗

彼識非自作非他作非自他作非非自非他
無因作然彼識增名色生尊者舍利弗復問
尊者摩訶拘締羅先言名色非自作非他作
非自他作非非自非他無因作然彼名色緣
識生而今復言名色緣識此義云何尊者摩
訶拘締羅答言今當說譬如智者因譬得解
譬如三蘆立於空地展轉相依而得豎立若
去其一二亦不立若去其二一亦不立展轉
相依而得豎立識緣名色亦復如是展轉相
依而得生長尊者舍利弗言善哉善哉尊者
摩訶拘締羅世尊聲聞中智慧明達善調無
畏見甘露法以甘露法具足身作證者謂尊

者摩訶拘絺羅乃有如是甚深義辯種種難
問皆悉能答如無價寶珠世所頂戴我今頂
戴尊者摩訶拘絺羅亦復如是是我今於汝所
使得善利諸餘梵行數詣其所亦得善利以
彼尊者善說法故我今以此尊者摩訶拘絺
羅所說法故當以三十種讚歎稱揚隨喜尊
者摩訶拘絺羅說老死馱患離欲滅盡是名
法師說生有取愛受觸六入處名色識馱患
離欲滅盡是名法師若比丘於老死馱患離
欲滅盡向是名法師乃至識馱患離欲滅盡
向是名法師若比丘於老死馱患離欲滅盡
不起諸漏心善解脫是名法師乃至識馱患

離欲滅盡不起諸漏心善解脫是名法師尊者摩訶拘絺羅語尊者舍利弗言善哉善哉於世尊聲聞中智慧明達善調無畏見甘露法以甘露法具足身作證者謂尊者舍利弗能作如是種種甚深正智之問猶如世間無價寶珠人皆頂戴汝今如是普爲一切諸梵行者之所頂戴恭敬奉事我於今日快得善利得與尊者共論妙義時二正士更相隨喜各還所住

如是我聞一時佛住王舍城迦蘭陀竹園此時世尊告諸比丘愚癡無聞凡夫於四大身獸患離欲背捨而非識所以者何見四大身

有增有減有取有捨而於心意識愚癡無聞
凡夫不能生厭離欲解脫所以者何彼長夜
於此保惜繫我若得若取言是我我所相在
是故愚癡無聞凡夫不能於彼生厭離欲背
捨愚癡無聞凡夫寧於四大身繫我我所不
可於識繫我我所所以者何四大色身或見
十年住二十三十乃至百年若善消息或復
少過彼心意識日夜時剋須臾轉變異生異
滅猶如獼猴遊林樹間須臾處處攀捉枝條
放一取一彼心意識亦復如是異生異滅多
聞聖弟子於諸緣起善思惟觀察所謂樂觸
緣生樂受樂受覺時如實知樂受覺彼樂觸

滅樂觸因緣生受亦滅止清涼息沒如樂受
苦觸喜觸憂觸捨觸因緣生捨受捨受覺時
如實知捨受覺彼捨觸滅彼捨觸因緣生捨
受亦滅止清涼息沒彼如是思惟此受觸生
觸樂觸縛彼彼觸樂故彼彼受樂彼彼觸樂
滅彼彼受樂亦滅止清涼息沒如是多聞聖
弟子於色生厭於受想行識生厭故不樂
不樂故解脫解脫知見我生已盡梵行已立
所作已作自知不受後有佛說此經已諸比

丘聞佛所說歡喜奉行

如是我聞一時佛住王舍城迦蘭陀竹園
時世尊告諸比丘愚癡無聞凡夫於四大色

身生獸離欲背捨但非識所以者何四大色
身現有增減有取有捨若心若意若識彼愚
癡無聞凡夫不能於識生獸離欲背捨長夜
保惜繫我若得若取言是我我所相在是故
愚癡無聞凡夫不能於彼生獸離欲背捨愚
癡無聞凡夫不能於四大色身繫我我所不可
於識繫我我所所以者何四大色身或見十
年住二十三十乃至百年若善消息或復少
過彼心意識日夜時剋須臾不停種種轉變
異生異滅譬如獼猴遊林樹間須臾處處攀
捉枝條放一取一彼心意識亦復如是種種
變易異生異滅多聞聖弟子於諸緣起思惟

觀察所謂樂觸緣生樂受樂受覺時如實知
樂受覺彼樂觸滅樂因緣生樂受亦滅止清
涼息沒如樂受苦觸喜觸憂觸捨觸因緣生
捨受捨受覺時如實知捨受覺彼捨觸滅捨
觸因緣生捨受亦滅止清涼息沒譬如兩木
相磨和合生火若兩木離散火亦隨滅如是
諸受緣觸集觸生觸集若彼彼觸集故彼彼
受亦集彼彼觸集滅故彼彼受集亦滅止清
涼息沒多聞聖弟子如是觀者於色解脫於
受想行識解脫於生老病死憂悲惱苦解脫
我說彼於苦得解脫佛說此經已諸比丘聞
佛所說歡喜奉行

如是我聞一時佛住王舍城迦蘭陀竹園
時世尊告諸比丘我說內觸法汝等爲取不
時有異比丘從座起整衣服稽首禮足合掌
白佛言世尊所說內觸法我已取也時彼比
丘於佛前如是如是自記說如是如是世尊
不悅念時尊者阿難在佛後執扇扇佛佛告
阿難如聖法律內觸法異於此比丘所說阿
難白佛今正是時唯願世尊爲諸比丘說賢
聖法律內觸法諸比丘聞已當受奉行
佛告阿難善哉諦聽當爲汝說此諸比丘取
內觸法應如是思惟若衆生所有種種衆苦
生此苦何因何集何生何觸作如是取時當

知此苦億波提因億波提集億波提生億波
提轉復次比丘內觸法又億波提何因何集
何生何觸彼取時當復知億波提愛因愛集
愛生愛觸復次比丘取內觸法當復知愛何
因何集何生何觸如是取時當知世間所念
諦正之色於彼愛生而生繫而繫住而住若

諸沙門婆羅門於世間所念諦正之色作常
想恒想安隱想無病想我想我所想而見則
於此色愛增長愛增長已億波提增長億波
提增長已苦增長苦增長已則不脫生老
病死憂悲惱苦我說彼不解脫苦譬如路側
清涼池水香味具足有人以毒著中陽春之

月諸行路者風熱渴逼競來欲飲有人語言
士夫此是清涼色香味具足然中有毒汝等
勿飲若當飲者或令汝死或近死苦而彼渴
者不信而飲雖得美味頃臾或死或近死苦
如是沙門婆羅門見世間可念端正之色作
常見恒見安隱見無病見我我所見乃至不
得解脫生老病死憂悲惱苦若諸沙門婆羅
門於世間可念端正之色觀察如病如癰如
刺如殺無常苦空非我彼愛則離愛離故億
波提離億波提離故則苦離苦離故則生老
病死憂悲惱苦離譬如路側清涼池水香味
具足有人以毒著中陽春之月諸行路者風

熱渴逼競來欲飲有人語言此水有毒汝等
勿飲若當飲者或令汝死或近死苦彼則念
言此水有毒若當飲者或令我死或近死苦
我且忍渴食乾麩飯不取水飲如是沙門婆
羅門於世間可念之色觀察如病如癱如刺
如殺無常苦空非我乃至解脫生老病死憂
悲惱苦是故阿難於此法如是見如是聞如
是覺如是知於過去未來亦於此道如是觀
察佛說此經已諸比丘聞佛所說歡喜奉行
如是我聞一時佛住王舍城迦蘭陀竹園介
時世尊告諸比丘云何思量觀察正盡苦究
竟苦邊時思量衆生所有衆苦種種差別此

諸苦何因何集何生何觸思量取因取集取
生取觸若彼取滅無餘衆苦則滅彼所苦滅
道跡如實知修行彼向次法是名比丘向正
盡苦究竟苦邊所謂取滅復次比丘思量觀
察正盡苦究竟苦邊時思量彼取何因何集
何生何觸思量彼取愛因愛集愛生愛觸彼
愛永滅無餘取亦隨滅彼所乘取滅道跡如
實知修習彼向次法是名比丘向正盡苦究
竟苦邊所謂愛滅復次比丘思量觀察正盡
苦究竟苦邊則思量彼愛何因何集何生何
觸知彼愛受因受集受生受觸彼受永滅無
餘則愛滅彼所乘愛滅道跡如實知修習彼

向次法是名比丘向正盡苦究竟苦邊所謂
受滅復次比丘思量觀察正盡苦究竟苦邊
時思量彼受何因何集何生何觸知彼受觸
因觸集觸生觸緣彼觸永滅無餘則受滅彼
所乘觸滅道跡如實知修習彼向次法是名
比丘向正盡苦究竟苦邊復次比丘思量觀
察正盡苦究竟苦邊時思量彼觸何因何集
何生何觸當知彼觸六入處因六入處集六
入處生六入處觸彼六入處滅無餘則觸滅
彼所乘六入處道跡如實知修習彼向次法
是名比丘向正盡苦究竟苦邊復次比丘思
量觀察正盡苦究竟苦邊時思量彼六入處

何因何集何生何觸知彼六入處名色因名
色集名色生名色觸名色永滅無餘則六入
處滅彼所乘名色滅道跡如實知修習彼向
次法故名比丘向正盡苦究竟苦邊所謂名
色滅復次比丘思量正盡苦究竟苦邊時思
量名色何因何集何生何觸知彼名色識因

識集識生識觸彼識欲滅無餘則名色滅彼
所乘識滅道跡如實知修習彼向次法故名
比丘向正盡苦究竟苦邊所謂識滅復次比
丘思量觀察正盡苦究竟苦邊時思量彼識
何因何集何生何觸知彼識行因行集行生
行觸作諸福行善識生作諸不善行不

善識生作無所有行無所有識生是爲彼識
行因行集行生行觸彼行欲滅無餘則識滅
彼所乘行滅道跡如實知修習彼向次法是
名比丘向正盡苦究竟苦邊所謂行滅復次
比丘思量觀察正盡苦究竟苦邊時思量彼
行何因何集何生何觸知彼行無明因無明
集無明生無明觸彼福行無明無明緣非福
行亦無明緣非福不福行亦無明緣是故當
知彼行無明因無明集無明生無明觸彼無
明永滅無餘則行滅彼所乘無明滅道跡如
實知修習彼向次法是名比丘向正盡苦究
竟苦邊所謂無明滅佛告比丘於意云何若

不樂無明而生明復緣彼無明作福行非福
行無所有行不比丘白佛不也世尊所以者
何多聞聖弟子不樂無明而生明無明滅則
行滅行滅則識滅如是乃至生老病死憂悲
惱苦滅如是如是純大苦聚滅佛言善哉善
哉比丘我亦如是說汝亦知此於彼彼法起
彼彼法生彼彼法滅彼彼法滅止清涼息沒
若多聞聖弟子無明離欲而生明身分齊受
所覺身分齊受所覺時如實知若壽分齊受
所覺壽分齊受所覺時如實知身壞時壽命
欲盡於此諸受一切所覺滅盡無餘譬如力
士取新熟瓦器乘熱置地須臾散壞熱勢悉

滅如是比丘無明離欲而生明身分齊受所
覺如實知壽分齊受所覺如實知身壞命終
一切受所覺悉滅無餘佛說此經已諸比丘
聞佛所說歡喜奉行

如是我聞一時佛住王舍城迦蘭陀竹園
時世尊告異比丘我已度疑離於猶豫拔邪
見刺不復退轉心無所著故何處有我為彼
比丘說法為彼比丘說賢聖出世坐空相應緣
起隨順法所謂有是故是事有是事有故是
事起所謂緣無明行緣行識緣識名色緣名
色六入處緣六入處觸緣觸受緣受愛緣愛
取緣取有緣有生緣生老死憂悲惱苦如是

如是純大苦聚集乃至如是純大苦聚滅如
是說法而彼比丘猶有疑惑猶豫先不得得
想不獲獲想不證證想今聞法已心生憂苦
悔恨朦沒障礙所以者何此甚深處所謂緣
起倍復甚深難見所謂一切取離愛盡無欲
寂滅涅槃如此二法謂有為無為有為者若
生若住若異若滅無為者不生不住不異不
滅是名比丘諸行苦寂滅涅槃因集故苦集
因滅故苦滅斷諸逕路滅於相續相續滅滅
是名苦邊比丘彼何所滅謂有餘苦彼若滅止
清涼息沒所謂一切取滅愛盡無欲寂滅涅
槃佛說此經已諸比丘聞佛所說歡喜奉行

如是我聞一時佛住王舍城迦蘭陀竹園
時世尊告諸比丘愚癡無聞凡夫無明覆愛
緣繫得此識身內有此識身外有名色此二
因緣生觸此六觸入所觸愚癡無聞凡夫苦
樂受覺因起種種云何為六眼觸入處耳鼻
舌身意觸入處若點慧者無明覆愛緣繫得
此識身如是內有識身外有名色此二緣生
六觸入處六觸所觸故智者生苦樂受覺因
起種種何等為六眼觸入處耳鼻舌身意觸
入處愚夫點慧彼於我所修諸梵行者有何
差別比丘白佛言世尊是法根法眼法依善
哉世尊惟願演說諸比丘聞已當受奉行

尔時世尊告諸比丘諦聽善思當爲汝說諸
比丘彼愚癡無聞凡夫無明所覆愛緣所繫
得此識身彼無明不斷愛緣不盡身壞命終
還復受身還受身故不得解脫生老病死憂
悲惱苦所以者何此愚癡凡夫本不修梵行
向正盡苦究竟苦邊故是故身壞命終還復
受身還受身故不得解脫生老病死憂悲惱
苦若點慧者無明覆愛緣所繫得此識身彼
無明斷愛緣盡無明斷愛緣盡故身壞命終
更不復受不更受故得解脫生老病死憂悲
惱苦所以者何彼先修梵行正向盡苦究竟
苦邊故是故彼身壞命終更不復受更不受

故得解脫生老病死憂悲惱苦是名凡夫及
點慧者彼於我所修諸梵行種種差別佛說
此經已諸比丘聞佛所說歡喜奉行
如是我聞一時佛住王舍城迦蘭陀竹園
時世尊告諸比丘此身非汝所有亦非餘人
所有謂六觸入處奉修行願受得此身云何
爲六眼觸入處耳鼻舌身意觸入處彼多聞
聖弟子於諸緣起善正思惟觀察有此六識
身六觸身六受身六想身六思身所謂此有
故有當來生老病死憂悲惱苦如是如是純
大苦聚集是名有因有緣世間集謂此無故
六識身無六觸身六受身六想身六思身無

謂此無故無有當來生老病死憂悲惱苦如是如是純大苦聚滅若多聞聖弟子於世間集世間滅如實正智善見善覺善入是名聖弟子招此善法得此善法知此善法入此善法覺知覺見世間生滅成就賢聖出離貫穿正盡苦究竟苦邊所以者何謂多聞聖弟子世間集滅如實知善見善覺善入故佛說此經已諸比丘聞佛所說歡喜奉行

如是我聞一時佛住王舍城迦蘭陀竹園介時世尊告諸比丘我今當說因緣法及緣生法云何爲因緣法謂此有故彼有謂緣無明行緣行識乃至如是如是純大苦聚集云何

緣生法謂無明行若佛出世若未出世此法
常住法住法界彼如來自所覺知成等正覺
爲人演說開示顯發謂緣無明有行乃至緣
生有老死若佛出世若未出世此法常住法
住法界彼如來自覺知成等正覺爲人演說
開示顯發謂緣生故有老病死憂悲惱苦此
等諸法法住法空法如法亦法不離如法不
異如審諦真實不顛倒如是隨順緣起是名
緣生法謂無明行識名色六入處觸受愛取
有生老病死憂悲惱苦是名緣生法多聞聖
弟子於此因緣法緣生法正智善見不求前
際言我過去世若有若無我過去世何等類

我過去世何如不求後際我於當來世爲有
爲無云何類何如內不猶豫此是何等云何
有此爲前誰終當云何之此衆生從何來於
此沒當何之若沙門婆羅門起凡俗見所繫
謂說我見所繫說衆生見所繫說壽命見所
繫忘諱吉慶見所繫今時悉斷悉知斷其根

本如截多羅樹頭於未來世成不生法是名
多聞聖弟子於因緣法緣生法如實正知善
見善覺善修善入佛說此經已諸比丘聞佛
所說歡喜奉行

如是我聞一時佛住拘留搜調牛聚落今時
世尊告諸比丘我當爲汝等說法初中後善

善義善味純一清淨梵行清白所謂大空法
經諦聽善思當爲汝說云何爲大空法經所
謂此有故彼有此起故彼起謂緣無明行緣
行識乃至純大苦聚集緣生老死者若有問
言彼誰老死老死屬誰彼則荅言我即老死
今老死屬我老死是我所言命即是身或言
命異身異此則一義而說有種種若見言命
即是身彼梵行者所無有若復見言命異身
異梵行者所無有於此二邊心所不隨正向
中道賢聖出世如實不顛倒正見謂緣生老
死如是生有取愛受觸六入處名色識行緣
無明故有行若復問言誰是行行屬誰彼則

答言行則是我行是我所彼如是命即是
身或言命異身異彼見命即是身者梵行者
無有或言命異身異者梵行者亦無有離此
二邊正向中道賢聖出世如實不顛倒正見
所謂緣無明行諸比丘若無明離欲而生明
彼誰老死老死屬誰者老死則斷則知斷其
根本如截多羅樹頭於未來世成不生法若
比丘無明離欲而生明彼誰生生屬誰乃至
誰行行屬誰者行則斷則知斷其根本如截
多羅樹頭於未來世成不生法若比丘無明
離欲而生明彼無明滅則行滅乃至純大苦
聚滅是名大空法經佛說此經已諸比丘聞佛

所說歡喜奉行

如是我聞一時佛在拘留搜調牛聚落小時
世尊告諸比丘我今當說緣起法法說義說
諦聽善思當爲汝說云何緣起法法說謂此
有故彼有此起故彼起謂緣無明行乃至純
大苦聚集是名緣起法法說云何義說謂緣
無明行者彼云何無明若不知前際不知後
際不知前後際不知於內不知於外不知內
外不知業不知報不知業報不知佛不知法
不知僧不知苦不知集不知滅不知道不知
因不知因所起法不知善不善有罪無罪習
不習若劣若勝染汗清淨分別緣起皆悉不

知於六觸入處不如實覺知於彼彼不知不見
無無間等癡闇無明大冥是名無明緣無明
行者云何為行行有三種身行口行意行緣
行識者云何為識謂六識身眼識身耳識身
鼻識身舌識身身識身意識身緣識名色者
云何名謂四無色陰受陰想陰行陰識陰云
何色謂四大四大所造色是名為色此色及
前所說名是為名色緣名色六入處者云何
為六入處謂六內入處眼入處耳入處鼻入
處舌入處身入處意入處緣六入處觸者云
何為觸謂六觸身眼觸身耳觸身鼻觸身舌
觸身身觸身意觸身緣觸受者云何為受謂

三受苦受樂受不苦不樂受緣受愛者彼云
何爲愛謂三愛欲愛色愛無色愛緣愛取者
云何爲取四取欲取見取戒取我取緣取有
者云何爲有三有欲有色有無色有緣有生
者云何爲生若彼彼衆生彼彼身種類生超
越和合出生得陰得界得入處得命根是名
爲生緣生老死者云何爲老若髮白露頂皮
緩根熟支弱背偻垂頭呻吟短氣前輪任杖
而行身體黧黑四體班駁闇鈍垂熟造行艱
難羸劣是名爲老云何爲死彼彼衆生彼彼
種類沒遷移身壞壽盡火離命滅捨陰時到
是名爲死此死及前說老是名孝死是名緣

起義說佛說此經已諸比丘聞佛所說歡喜
奉行

如是我聞一時佛住拘留搜調牛聚落時有
異比丘來詣佛所稽首禮足退坐一面白佛
言世尊謂緣起法爲世尊作爲餘人作耶佛
告比丘緣起法者非我所作亦非餘人作然
彼如來出世及未出世法界常住彼如來自
覺此法成等正覺爲諸衆生分別演說開發
顯示所謂此有故彼有此起故彼起謂緣無
明行乃至純大苦聚集無明滅故行滅乃至
純大苦聚滅佛說此經已時彼比丘聞佛所
說歡喜隨喜作禮而去

如是我聞一時佛住拘留搜調牛聚落時有
異娑羅門來詣佛所與世尊面相慶慰慶慰
已退坐一面白佛言云何瞿曇爲自作自覺
耶佛告娑羅門我說此是無記自作自覺此
是無記云何瞿曇他作他覺耶佛告娑羅門
他作他覺此是無記娑羅門白佛云何我問
自作自覺說言無記他作他覺說言無記此
義云何佛告娑羅門自作自覺則墮常見他
作他覺則墮斷見義說法說離此二邊處於
中道而說法所謂此有故彼有此起故彼起
緣無明行乃至純大苦聚集無明滅則行滅
乃至純大苦聚滅佛說此經已彼娑羅門歡

喜隨喜從座起去

如是我聞一時佛住那梨聚落深林中待賓
舍介時尊者躡陁迦旃延詣佛所稽首佛足
退住一面白佛言世尊如世尊說正見云何
正見云何世尊施設正見佛告躡陁迦旃延
世間有二種依若有若無爲取所觸取所觸
故或依有或依無若無此取者心境繫著使
不取不住不計我苦生而生苦滅而滅於彼
不疑不惑不由於他而自知是名正見是名
如來所施設正見所以者何世間集如實正
知見若世間無者不有世間滅如實正知見
若世間有者無有是名離於二邊說於中道

所謂此有故彼有此起故彼起謂緣無明行
乃至純大苦聚集無明滅故行滅乃至純大
苦聚滅佛說此經已尊者躡隨迦旃延聞佛
所說不起諸漏心得解脫成阿羅漢

如是我聞一時佛住王舍城耆闍崛山尔時
世尊晨朝著衣持鉢出耆闍崛山入王舍城
乞食時有阿支羅迦葉爲營小事出王舍城
向耆闍崛山遙見世尊見已詣佛所白佛言
瞿曇欲有所問寧有閑暇見答與不佛告迦
葉今非論時我今入城乞食來還則是其時
當爲汝說第二亦如是說第三復問瞿曇何
爲我作留難瞿曇云何有異我今欲有所問

為我解說佛告阿支羅迦葉隨汝所問阿支
羅迦葉白佛言云何瞿曇苦自作耶佛告迦
葉苦自作者此是無記迦葉復問云何瞿曇
苦他作耶佛告迦葉苦他作者此亦無記迦
葉復問苦自他作耶佛告迦葉苦自他作此
亦無記迦葉復問云何瞿曇苦非自非他無
因作耶佛告迦葉苦非自非他此亦無記迦
葉復問云何無因作者瞿曇所問苦自作耶
答言無記他作耶自他作耶非自非他無因
作耶答言無記今無此苦耶佛告迦葉非無
此苦然有此苦迦葉白佛言善哉瞿曇說有
此苦為我說法令我知苦見苦佛告迦葉若

受即自受者我應說苦自作苦他受他即受者
是則他作若受自受他受復與苦者如是者
自他作我亦不說若不因自他無因而生
苦者我亦不說離此諸邊說其中道如來說
法此有故彼有此起故彼起謂緣無明行乃
至純大苦聚集無明滅則行滅乃至純大苦
聚滅佛說此經已阿支羅迦葉遠塵離垢得
法眼淨時阿支羅迦葉見法得法知法入法
度諸狐疑不由他知不因他度於正法律心
得無畏合掌白佛言世尊我今已度我從今
日歸依佛歸依法歸依僧盡壽作優婆塞證
知我阿支羅迦葉聞佛所說歡喜隨喜作禮

而去時阿支羅迦葉辭世尊去不久為護犢
特牛所觸殺於命終時諸根清淨顏色鮮白
尔時世尊入城乞食時有衆多比丘亦入王
舍城乞食聞有傳說阿支羅迦葉從世尊聞
法辭去不久為牛所觸殺於命終時諸根清
淨顏色鮮白諸比丘乞食已還出舉衣鉢洗
足詣世尊所稽首禮足退坐一面白佛言世
尊我今晨朝衆多比丘入城乞食聞阿支羅
迦葉從世尊聞法律辭去不久為護犢牛所
觸殺於命終時諸根清淨顏色鮮白世尊彼
生何趣何處受生彼何所得佛告諸比丘彼
已見法知法次法不受於法已般涅槃汝等

當往供養其身尔時世尊為阿支羅迦葉受
第一記

如是我聞一時佛住王舍城耆闍崛山中尔
時世尊晨朝著衣持鉢入王舍城乞食於路
見玷牟留外道出家少有所營至耆闍崛山
遊行遙見世尊往詣其所共相慶慰共相慶
慰已於一面住白佛言瞿曇欲有所問寧有
閑暇為解說不佛告玷牟留外道出家今非
論時須入城乞食來還當為汝說第二說亦
如是第三復請沙門瞿曇將於我所作留難
不欲有所問為我解說佛告玷牟留外道出
家隨汝意問當為汝說玷牟留外道出家即

問沙門瞿曇苦樂自作耶佛告玷牟留外道
出家說苦樂自作者此是無記復問沙門瞿
曇苦樂他作耶佛告玷牟留外道出家說苦
樂他作者此是無記復問沙門瞿曇苦樂自
他作耶佛告玷牟留外道出家說苦樂自他
作者此是無記復問瞿曇苦樂非自非他無
因作耶佛告玷牟留外道出家說苦樂非自
非他無因作者此是無記廣說如上阿支羅
迦葉經乃至世尊為玷牟留外道出家受第
一記

弱音若壅鳥用既上灌既下音愛貫音解下枿擊反穴

颺余向反又音羊幹古旦反柯音哥樵二同樂反自音逕定古

反拘締之下反丑閑反暇夏下音麩尺小反分齊字二

並夫拔蒲入蒙音蒙慧反閑八忌諱位下許反緩伴胡

反背儻主下力輸式朱反黧黑上音斑駁下必反鈍

徒困羸力垂躒蘇安反犢行讀二字音玷音

